

# Duas medias e duas opiniuns davart l'interrupziun a termin

La nova lescha porscha meglieras premissas per giuvnettas che vegnan en speranza

DA CLAUDIA CADRUVI PFEIFFER / ANR

■ (anr/vi) Amez Cuira, sisum la via Engadin, sa chatta ina pratica da medis. Dapi decennis vegn quella frequentada bunamain mo da dunnas. Pli baud ha dr. Ursulina Mutzner-Scharplatz practitgà là. Avant dus onns ha ella surdà la pratica a dr. Xenia Bischof. Ella è ginecologa. Pliras generaziuns da dunnas grischunas èn pia stadas tar las duas medias. Ellas enconuschan ils quitads da las dunnas da pli baud ed era ils pensiers che foran ozildi. L'anr ha vuli savair da Mutzner e da Bischof, tge ch'ellas pensan davart l'interrupziun a termin, il project che vegn en votaziun ils 2 da zercladur. Ellas èn da different'opiniun.

## «Mes venter»

«Ensasez èsi ina buna lescha», di Mutzner. Tuttina na po la media betg sa stgandar per quest project. Ella avess pli gudent la lescha vertenta e liberalisass quella. Fin uss vala be l'indicaziun medicinala sco raschun legala per l'interrupziun da la gravidanza. Mutzner è da l'opiniun ch'i bastass da cumplettar la veglia lescha cun l'indicaziun sociala.

Il text da la lescha è atgnamain betg quai che disturba Mutzner. Igl è plitost la propaganda agressiva per l'interrupziun a termin. Ch'ins ditgia «Mes venter tutgia be a mai» na plascha betg ad ella. I gjaja gea betg sulet per il venter. Tar il



Pliras generaziuns da dunnas èn stadas en la pratica en la via Engadin a Cuira: Pli baud tar Ursulina Mutzner-Scharplatz ed oz tar Xenia Bischof (san.).

FOTO P. A. PARLI

parturir u stgatschar giaja quai per la dumonda, sche las dunnas possian surpigiar la responsabladad per sasezzas e per l'uffant u ev. era per ils problems che vegnan suenter ina interrupziun.

## Abort pervi da carriera?

Ma la reclama dal comité cunter l'interrupziun a termin commentescha Mutzner medemamain a moda critica. Là vegnan preschentadas dunnas che pretendan ch'ellas hajan stgatschà sulet pervi da lur carriera ed oz stettian ellas mal. A la dumonda, sch'ella enconuschia tals

cas, respunda Mutzner ch'ella haja fastisà il cuntrari: «Las dunnas dattan plitost si lur carriera per amur dals uffants.» «Mintga dunna reagescha auter cura ch'ella vegn en speranza», repeta Mutzner. Sco media ha ella perquai adina duvrà sia intuiziun cun cussegliair dunnas ch'eran en speranza. Tar la lescha vertenta dovran ins l'expertisa medicinala da dus medis, resp. d'ina media e d'in psichiater, sch'ins sto stgatschar. Cun la nova lescha tanschiss «in discurs minuzius» cun in soli medi. «Jau n'avess mai vuli decider quai sulet cun ina dun-

na», commentescha Mutzner questa midada. Ella saja adina stada leda, sche las dunnas hajan fatg ina segunda consultaziun en cas d'ina interrupziun.

## Giuvnettas tschertgan l'anonimidad

Xenia Bischof ha in'otra vista. Ella è per l'interrupziun libra da chasti «entaifer las emprimas dusesch emnas suenter l'ultima perioda», uschia statti scrit en la nova lescha. La segunda consultaziun na midia betg bler. Ina dunna che sa decida per ina interrupziun vegnia adina a chattar ina via da far quel-

la e na sa laschia betg persvader d'insatgi auter.

La nova lescha porta tenor Bischof era avantatgs per dunnas giuvnas. En sia pratica vegnian magari giuvnettas. I sa tracta da dunnas d'ordaifer la citad. Quellas na gughegian betg dad ir tar il medi da chasa. «Questas giuvnettas èn persulas suenter in'interrupziun.» Dunna Bischof deplorescha questa situaziun. I fiss meglier, sche las giuvnas vegnissan cussegliaidas pli intensivamain.

## Anc oz in tabu

Pervi dal scumond en la lescha vertenta, sa zuppan las giuvnas en l'anonimidad. L'interrupziun da la gravidanza vegnia anc adina tabuisada, era da dunnas pli veglias, constatescha Bischof. Strusch ina dunna gughegia da discurre avertamain, sch'ella ha già ina interrupziun. Bischof spera che quest tabu svanescha cun la nova lescha. Uschia savessan gist era las giuvnas sa volver tar il medi da chasa. Lez enconuscha ellas e po suenter in'interrupziun plitost procurar ch'ellas restan betg sulettas cun sch'ellas han problems.

Plinavant perscriba la lescha davart l'interrupziun a termin che dunnas sut 16 onns ch'èn en speranza ston ir en ina cussegliaziun spezialisada. In medi che fa in test da gravidanza positiv tar ina dunna giuvna, sto procurar che la giuvna sa renda en questa consultaziun speziala. Uschiglio vegn il medi punì.